

Tranter Brambrüesch e Churer Joch

La regiun da Tschierschen-Praden, Passugg e Malix

■ Il LIR fa oz staziun a la cruschada da Cuira, Tschierscha-Prada e Malix/Curvalda. Araschga, nua che sa spartan las vias per Tschierscha e Lai, appartegna per part anc a la citad da Cuira. En vischinanza è situada la chavorgia da la Rabiusa cun la chasa da cura Passugg (oz Scola d'hotellaria e da turissem) e la producziun d'aua minerala da medem num. Las anteriuras vischnancas politicas da Prada e Tschierscha èn situadas sin la spunda sanestra dal Scanvetg ed han fusiunà il 2009 a Tschierscha-Prada. L'antieriura vischnanca politica da Malix appartegna dapi il 2010, ensemen cun Curvalda e Parpan, a la vischnanca da Curvalda.

Araschgen (Araschga)

Aclauns situads a 750–800 m a la sortiada da la Val Curvalda; parts da las vischnancas politicas da Cuira, Malix e Curvalda. Ca. 1350 *Giraschga*, tudestg Araschgen. L'aua d'Araschga, menziunada en il 16avel tschientaner e rescuverta il 1863, è daventada econuschenta, ensemen cun la chasa da cura e l'interpresa d'embuttigliar, sut il num Passugg vers la fin dal 19avel tschientaner. La via charrabla da Cuira a Tschierscha è vegnida construida il 1887–94. La part da la culegna da purs pitschens e schurnaliers, ch'appartegna a la vischnanca da Cuira, è sa sviluppada en il davos temp ad in quartier da pendularis.

Jürg Simonett

Passugg

Funtaunas termalas e chasa da cura sin territori da la vischnanca da Curvalda. 1488 *Basuk*. Il 1562 ha rapportà Conrad Gessner d'ina funtauna ascha. A quest rapport suondan ulteriuras singulas menziuns. A partir dal 1863 han ins rescuvert successivmain tschintg funtaunas. Il 1863 è vegnida averta l'emprima bavetta en la chavorgia da la Rabiusa, il 1883 l'emprima chasa da cura al Mühlein. En ils emprims rapports vegnan las funtaunas termalas numadas «auas d'Araschga», tenor la culegna a la cruschada da las vischnancas da Cuira, Malix e Curvalda. Il num Passugg, che deriva d'in bain en il conturn da l'enchaschament da las funtaunas, vegn utilisà dapi la fin dal 19avel tschientaner. La Passugger Heilquellen AG, che producescha



Chasa da cura Passugg enturn il 1910.

aua minerala, è ida il 1998 en possess da la Feldschlösschen-Hürlimann Holding AG ch'ha vendì l'onn 2000 sia fatschenta da bavrondas a la bieraria danesa Carlsberg. La chasa da cura serva d'hotel da scolaziun a la Scola d'hotellaria e da turissem a Cuira.

Jürg Simonett

Rabiusa

Num da plirs flums ed auals en il Grischun. Dus da quests èn impurtants. L'emprim percurra la Val Stussavgia per sbucar al nord da Versomi tar l'Isla Bella en il Rain Anteriur. L'autra Rabiusa impurtanta nascha al Stätzerhorn sur Curvalda e sbucca a Cuira en la Plessur. En il 19avel tschientaner vegniva ella utilisada da la filandaria Meiersboden a Cuira.

Adolf Collenberg

Praden (Prada)

Antieriura vischnanca politica, circol Curvalda, district Plessur. Fusiunada il 2009 cun Tschierscha a la vischnanca politica Tschierscha-Prada. Il vitg construi lung la via cumpiglia las duas parts Innerpraden (a 1100 m) ed Ussepraden

(enfin a 1250 m), situadas sin la spunda sanestra dal Scanvetg. 1488 *Praden*, tudestg Praden (uffizial). 1803 150 abitants; 1850 144; 1900 131; 1950 98; 1980 51; 2000 101. La cuntrada da Prada, urbanisada da Rumantschs, è vegnida colonisada enturn il 1300 tras Gualsers domiciliads a Pralung. La culegna era en il temp medieval in feud ereditar da la claustra da S. Gliezi e dal chapitel catedral da Cuira. Il domini han exequì ils de Vaz fin il 1338, alura ils de Werdenberg ed a partir dal 1363 ils de Toggenburg. Prada furmava in vischinadi dal cumin da Pralung cun participaziun a la dretgira bassa e tscherna libra dal derschader. Il 1488 è attestà in agen cuvigt per Prada. Ils novs suverans èn stads ils Montforts a partir dal 1437, suandads dals Matschs il 1471 e da l'Austria il 1479. Prada ha appartegnì ecclesiasticamain a S. Gieri/Castiel, pli tard a la chaplutta dals ss. Giachen e Cristoffel a Tschierscha, documentada 1405. Enturn il 1530 ha la vischnanca adoptà la cretta refurmada ed il 1629–42 ha ella obtegnì in'atgna baselgia. Il 1652 ha Prada cumprà ora ils dretgs signurils, il 1657 ils dretgs feudals episcopals. La vischnanca viveva da l'allevament da muvel, d'in pau agricultura e da la vendita da puma (oravant tut tschareschas). Il 1851 è Prada passà da Pralung al circol da Curvalda. Il 1887–94 è vegnida construida la via charrabla Cuira-Prada-Tschierscha. Grazia a sia politica da domiciliaziun, ha la vischnanca pudì dublar il dumber d'abitants tranter il 1980 ed il 2000. Il 2005 lavuravan 61 % da las persunas cun activitad da gudogn a Prada en il sectur terziar (oravant tut pendularis utrò).

Jürg Simonett

Tschierschen (Tschierscha)

Antieriura vischnanca politica, circol Curvalda, district Plessur. Fusiunada il 2009 cun Prada a la vischnanca politica da Tschierscha-Prada. Vitg a mantun situà a 1351 m da la vart sanestra da la Val Scanvetg. Fin dal 8avel tschientaner in *Cercene*. 1803 130 abitants; 1850 124; 1870 160; 1900 139; 1950 174; 2000 225. Chat da munaidas dal temp roman. Culegna rumantscha tempriva cun cultivaziun dad ers cumprovada. Ils bains da la claustra da Curvalda, menziunads il 1222, decleran l'orientaziun da Tschierscha sur il Joch vers il vest e l'appartegnientscha da la vischnanca al signuradi da Strassberg. Sco possessurs da quels vegnan numnads il 1275 ils Vazs, suenter il 1338 ils Toggenburgs, Montforts e Matschs. Il cumin da Curvalda, sorti dal signuradi

da Strassberg, cun il vischinadi da Tschierscha, è s'unì il 1436 a la Lia da las Diesch Dretgiras. Ecclesiasticamain appartegniva Tschierscha a S. Gieri/Castiel. La chaplutta consecrada als ss. Giachen e Cristoffel vegn menziunada per l'emprima giada il 1405. Il 1472 ha la pravenda obtegnì in plevon. Tschierscha ha introduci la refurmaziun ed erigì il 1550 in'atgna baselgia parochiala. Enturn il 1570 è la vischnanca vegnida germanisada da Gual-



Il vitg da Tschierschen è situà da la vart sanestra dal Scanvetg.

FOTO J. MENOLFI

sers. Il 1649 ha Tschierscha cumprà ora ils dretgs austriacs applitgads dapi il 1466. La via charrabla, construida il 1893–94, ha effectuà in svilup turistic ch'è sa repetì cun la construcziun da rurnals a partir dal 1952. Il 2008/09 disponiva Tschierscha da 110 letgs d'hotel e da ca. 320 letgs en la parahotellaria. Meglieraziun generala 1977–98.

Jürg Simonett

Malix

Antieriura vischnanca politica, circol Curvalda, district Plessur, fusiunada il 2010 cun Curvalda e Parpan a la vischnanca da Curvalda. Vitg a mantun situà a l'entrada da la Val Curvalda, cun las fracziuns da Kreuz e Spina. 1149 in *Umbilico*. 1623 ca. 375 abitants; 1850 426; 1900 340; 1950 450; 2000 663. Il territori da Malix, da veglia colonisaziun, era surtapost a la dierschma dal chapitel catedral da Cuira; la claustra da S. Gliezi/Cuira e, il pli tard dapi il 1208, l'abazia da Curvalda possedeavan là bains. Il chastè da Strassberg (duana), situà a la ruta dal Set, datescha da la segunda mesadad dal 12avel

tschientaner. Il 1268 è Malix attestà sco vischinadi cun agens giuraders. Ils possessurs dal signuradi da Strassberg eran ils Vazs (1275), Toggenburgs (suenter il 1338), Montforts e Matschs. La dretgira da Curvalda, sortida dal signuradi, è s'unida il 1436 cun la Lia da las Diesch Dretgiras. Il 1649 ha la vischnanca cumprà ora ils dretgs austriacs, existents dapi il 1466. Il 1231 vegn menziunà per l'emprima giada in prer secular a Malix, il 1307 ina pravenda, il 1508 la baselgia da S. Gagl. Il 1526 ha la vischnanca aderi a la refurmaziun. La populaziun, che discurreva anc rumantsch enturn il 1570, viveva da l'allevament da muvel, da la cultivaziun dad ers e dal traffic da transit. Tranter il 1834 ed il 1840 è vegnida construida la via charrabla. Dapi la segunda mesadad dal 20avel tschientaner è l'acclun da Brambrüesch vegni explotà pli e pli per il turissem (chasa da vacanzas, pendiculara davent da Cuira dapi il 1957, regiun da skis). Malix fa part oz da l'aglomeraziun da Cuira (il 2000 gievan dapli che dus terzs a lavurar ordaifer).

Jürg Simonett

Strassberg

Ruina da chastè en il territori da la vischnanca da Malix, situada sin ina collina furmada d'ina morena a sparun. L'areal dal chastè avanzà sa chatta al ped dal chastè principal, dal qual èn sa mantegnidas l'imposanta tur principala e parts dal mir da tschinta pli vegl. Al segund plaun sa chatta in'entrada auta, al terz e quart plaun locals d'abitar. Al nordvest da la tur era la latrina cun in scul en il mir. La curnisch è dentada (probablmain tetg a piramida). Las



Ruina da Strassberg en la vischinanza da Malix (foto dal 1937).

Lexicon Istoric Retic

Il LIR cumpiglia bundant 3100 artigels (geografics, tematics, artigels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.